



Jumat, 26 Juli 2024
Ogen: Pilipi 4:19



Dibata Mereken Kerina Si Perlukenndu



Tentu pernah si begi kata "Jehovah Jireh" si ertina Allah yang menyediakan (Kej. 22:8). Enda merupakan kalimat si terbelas arah babah Abraham asum ia ras Ishak lawes ku deleng Moria guna mpersembahkan anakna Ishak man Dibata. Dibata si nikapkensa. Kata Jehovah Jireh enda pe jadi sada kata si popular i bas masa gundari. Biasana kalak Kristen makeken kata enda i bas paksa kesuliten ekonomi. Kata enda jadi pergegeh man bana maka Dibata labo pernah nadingken umatNa ras tetap nikapken kai si iperluken manusia e. Tapi megati pemakaian kata "Jehovah Jireh" enda ngelupakan konteks pernyataan kiniteken Abraham. Mbue kalak make kata e alu makna "Tuhan encukupisa kai si kuperluken". Si itekanken i je e me "berkat untuk aku" e maka kita berhak iberkati Tuhan piahna ndabuh ku bas mementingkan diri sendiri. Adi si perdiatoken kata-kata Abraham asum ia erbahan sada pernyataan kiniteken kerna Jehovah Jireh, nina " *Elohim yireh low hasseh leolah..*" si ertina "Allah yang Mahatinggi akan menyediakan bagi diriNya sendiri seekor domba untuk korban bakaran" ertina si sediaken/si isikapken Dibata man Abraham e me persembahen si ipersembahen mulihi man baNa. Sendalanan ras sie, i bas surat Paulus man perpulungen Pilipi, Paulus pe ngatakensa maka Dibata si simpar alu kebayaken si lit ibas Kristus mereken kerina keperluanndu. Labo ngatakensa maka kai si iperluken kita mis isehken Tuhan. Tapi i bas sie lit dua makna, si pemena makna kerna Dibata nikapken Kristus jadi persembahen penebusen man kalak perdosa janah si peduaken e me Dibata mereken si iperluken kita gelah banci enda pe si bahan jadi pemere ras persembahen mulihkan man baNa. Adi kita mindo man Tuhan kerna keperluanlunta tapi labo kita pernah nginget IA alu mereken persembahen baNa ras nampati kalak sideban maka kita enda jadi kalak si ngukuri kepentingan dirinta ngenca. Sebab Paulus ngerana kerna sie encidahken maka labo pernah kalak kekurange i bas ia nampati kalak sideban sabap Dibata simpar alu kebayaken!

🔍 Tetap ukur, Dibata nikapken siperluken bas nemah IA